

# "Vive la Difference!"

Na algun pais, femenistanan radikal, oponiendo kontra e deseño maravioso di nos Kreador, ta insistí ku hende hòMBER i hende muhé ta identiko; solamente nan kurpa ta otro. Ambos sekso mester por hasi trabou similar (p.e. military). Algun asta ta promové un bida lèsbian.

Segun Beibel "*Dios a krea hende segun Su mes imagen... hòMBER i muhé El a krea nan*" (Gènesis 1:27). Skritura ta papia di dos ser humano distinto ku ta armonisá ku otro na un forma fantastiko. Den último añanan, sientífikonan ta verifiká loke Palabra di Dios ta deklará; ku e diferensianan entre e seksonan ta enserá muchu mas ku aparensia físiko. Nota algun diferensia.

Kada sèl den e kurpa maskulino ta distinto for di e sèlnan femenino. Diferensianan den kombinashon di "chromosome" ta e motibu básiko ku un beibi ta muhé i e otro hòMBER.

Maske hende hòMBER tin 50% mas forsa físiko ku e sekso femenino, damanan ta mas duradero, talbes pa motibu di e diferensia di "chromosome." En general, nan ta biba tres te kuater aña mas ku e sekso maskulino.

Skelèt di e dos seksonan ta diferente. Kabes di un dama ta mas kòrtiku, kara mas hanchu, kachete ménos riparabel, pianan mas kòrtiku, i torso mas largu. Su stoma, nir, higra, i apèndis ta mas grandi, mientras su pulmon ta mas chikitu.

E sekso femenino ta soportá kalor mihó. Damanan tin sierto funshon físiko úniko: menstruashon, embaraso, i lechi. Esakinan ta influensia su komportashon i emoshon. E glándula tiroideo ("schildklier") ta funshoná diferente den e dos seksonan. Esun di hende muhé ta mas grandi i mas aktivo. E ta bira mas grandi durante embaraso i menstruashon. Komo resultado struma ta mas komún serka hende muhé. E glándula aki tambe ta responsabel pa e echu ku e sekso femenino tin kueru mas suave, ménos kabei na kurpa, i un "laag" fini di vèt bou di kueru--loke ta kontribuí na su bunitesa. Esaki tambe ta hasi'e mas sensibel emoshonalmente; e ta hari i yora mas fásil.

Sanger di e dama ta kontené mas awa i 20% ménos sèl korá. Debí ku e sèlnan korá ta hiba oksígeno na e sèlnan di kurpa, e ta kansa mas lihé i tin mas tendensia pa kai flou. Durante segunda guera mundial, fábrikanan ingles a oumentá e 10 ora di trabou pa 12 ora. E frekuensia di aksidente na trabou a eskalá 150% pa empleadonan femenino ma a keda méskos pa hende hòMBER.

Kurason di hende muhé ta bati mas rápido. E averahe pa hende muhé ta 80 bes pa minüt en komperashon di 72 pa hende hòMBER. Su preshon ta 10 punto mas abou ku preshon di e sekso maskulino i ta varia kada ratu. Ma e tin ménos tendensia pa tin preshon haltu--te despues di menopous.

E selebre ta funshoná distinto den kada sekso. Hende hòMBER ta usa mitar di su sesu, banda robes mas parti. Esaki ta pon'é pensa na un manera lógiko. Ma e sekso femenino ta hasi uso di henter su sesu. E dos banda di e selebre ta komuniká ku otro, analisando informashon i ta produsí un konklushon instantaneo. E hòMBER, usando su lógika, no por komprenché kon e muhé a yega na tal konklushon. E dama tampoko no sa; e sa solamente ku e ta sinti ku ta asina e mester ta.

Si, e hòMBER i muhé ta diferente! Danki Dios ku tin dos sekso den e mundu aki! Kontrario di opinion di femenistanan radikal, bida lo tabata hopi laf si tabatin un sekso so!

Ta bèrdat ku algun problema entre e seksonan ta surgí simplemente pasobra nan ta diferente. Parehanan mester komprenché esaki i adaptá nan na nan kasá. Manera Beibel ta bis'é, "*...esposonan, biba ku boso esposonan ku kompreshon, manera ku un vaso mas delikado...I dun'é onor...*" (1 Pedro 3:7).

E diferensia entre e seksonan ta maravioso! Nan por ta un okashon pa konflikto òf kompreshon. Si esposonan i esposanan lo realisá ku Dios a krea dos sekso igual pero distinto pa nan por armonisá ku otro, nan por kuminsá gosa e diferensianan na lugá di laga esaki bira un kousa di frikshon. Na lugá di oponé kontra e deseño di nos Kreador, nos por selebrá i bisa huntu ku e franses "Vive la difference!"